

122 *Relation de ce qui s'est passé*  
auoit sur luy, que nous en eussions soin, & qu'il seroit toujours nostre, s'il retournoit en santé. Cecy se passa sur la fin du mois d'Octobre, & trois mois estant écoulés, il recouura vne si parfaite santé, que l'ayant presté à vne de nos familles Chrestiennes, il tua sur la fin de l'hyuer plus d'vne douzaine d'eslans.

Le soin que nous prîmes de ce pauvre abandonné donna occasion à quelques Sauvages de degrader à vn jet de pierre de nostre maison, deux femmes fort vieilles, & incommodées que nous auions baptisées vn peu auparauant, l'vne desquelles voyoit iusqu'à la troisième generation; & si la veuë ne luy diminueoit notablement tous les iours avec l'esprit, elle verroit dans peu de temps iusqu'à la quatrième: l'autre n'estoit pas si aagée, mais pour le moins aussi incommodée à raison des vlceres qui luy mangeoient vne iambe, l'vne & l'autre estoient dans l'impuissance de marcher: nous ne voulusmes pas les laisser mourir de misere deuant nos yeux, ny faire instance qu'on les rembarquast, crainte que le refus, que nous eussions fait de les assister, n'eust donné occasion à ces barbares de leur décharger plustost vn coup de hache sur la teste, que